

## Carta Para Ixin Chojni Judío Que Nichja Nguigoa Hebreo

*Dios joinchegonda Xenhe para que jehe nichjé chojni*

<sup>1</sup> Ngain tiempo are saho, Dios joinchegonda profeta para que Dios nichja tsje nttiha co de tsje manera ngain nindogoelitoa na xančhen. <sup>2</sup> Pero jai, ngain nchanho tehe, Dios joinchegonda Xenhe para que jehe nichjá na ján na. Dios joinchegonda cainxin cosa que jí ngain mundo jiji pero de ixin jehe Xenhe, co jehe cointtoehe Xan cainxin cosa jiji para que jehe Xan tsetonha Xan. <sup>3</sup> Jehe Xenhe Dios mé tti Xan tjago glorié Ndodé Xan, co jehe Xan jí Xan mero xajeho inchin Dios jí, co jehe Xan, Xan jiquehe cainxin cosa de ixin palabré Xan, ixin palabré Xan chonda anto tsje joachaxin. Co are joexin jointtaroa na Xan ján na de cain tti jianha que teca na, jehe Xan sajoiguehe Xan ngain lado jian de tti lugar que retaha Dios nttiha ngajni.

*Xenhe Dios chonda Xan icha joachaxin que cain ángel de Dios*

<sup>4</sup> Mexinxin Xenhe Dios joiguehe Xan icha importante que cain ángel de Dios, ixin Dios chjé jehe Xan de herencia ná cargo icha importante que cargoe cain ángel.

<sup>5</sup> Ixin Dios xonhi tiempo ndačo ngain ni ná ángel janhi:  
Jaha tti Xanhna;

janha chjaha vida jai.

Ni ndačoha Dios de ixin ni ná ángel:

Janha sarihi Ndodé jehe,  
co jehe sehe Xanhna janha.

<sup>6</sup> Pero are Dios rroanha tti nacoa Xenhe, xansaho  
co icha jian ngataha nontte jihi, jehe ndačo:  
Cainxin ángel de Dios chonda que sinchesayehe  
jehe Xan.

<sup>7</sup> Co de ixin cain ángel de Dios, jehe Dios ndačo:  
Janha nchao nttacjamanga cain ángel inchin  
čhintto que jitja,  
co cain ángel que nchehe xana janha nchao nttac-  
jamanga inchin neje xohi.

<sup>8</sup> Pero de ixin Xenhe Dios, jehe ndačo janhi:  
Tti joachaxin que jaha chonda, oh Dios, xonhi  
tiempo tsjexin;  
co tti jaha ttetonha, ján rrittetonha inchin jiquin-  
inxin.

<sup>9</sup> Jaha cain tiempo rinao cain cosa jian, co ninga-  
conhe cain cosa jianha;  
mexinxin janha, tti Dios de jaha, coinchiá jaha  
co ndačjan que jaha icha rrochaha  
que cain nicompañeroa.

<sup>10</sup> Co cai ndačo Dios ngain Xenhe:  
Jaha, tti chonda cain joachaxin, desde are saho  
jaha tti joinchechjian nontte,  
co jaha joinchechjian ngajni conixin rá.

<sup>11</sup> Nontte co ngajni ndatsjexin, pero jaha sarihi  
para cainxin tiempo.

Nontte co ngajni ndatsonttaxí inchin lontto.

<sup>12</sup> Co jaha tsjadoho nontte co ngajni jian inchin  
rrocji ná vestido,

co jaha tsentoxinhi cayoi cosa jihi inchin chojni  
ttentoxinhi lonttoe na.

Pero jaha cainxin tiempo sarihi xajeho,  
co vidá xonhi tiempo tsjexin.

<sup>13</sup> Co Dios xonhi tiempo ndačo ngain ni ná ángel:  
Jaha darihi lado jian na  
hasta que janha sinttagacha jaha de ngain cain tti  
ningaconha.

<sup>14</sup> Cain ángel jehe espíritu para ngain xé Dios, co  
Dios rroanha ángel mé para tsjenguijna cain tti  
chojni que sayé iná vida naroaxin.

## 2

*Chonda ni que sicao ni cuidado para que sayé ni  
iná vida naroaxin*

<sup>1</sup> Mexinxin ján na chonda na que icha tsjinho  
na cuidado de ngain tti ocoihí na para que  
sachjendaha na de ngain tti nttiha ndoa. <sup>2</sup> Tti  
joajna que Dios coetonhe ángel para joindačo  
ngain nindogoelitoa na xančhjen are saho, joa-  
jna mé Dios cjoago que ján ndoa. Co tti cho-  
jni que joincheha inchin coetonha joajna mé,  
Dios joinchecastigá na inchin jiquininxin na.

<sup>3</sup> Mexinxin ján na ¿que xén satsinguehe na castigoe  
Dios si sonttoha na caso jehe tti vida naroaxin que  
danjo jehe Dios? Ixin Jesús mismo tti saho join-  
dačo de ixin jehe vida naroaxin jihi, co después  
tti chojni que coinhi de ngain Jesús de ixin jehe  
vida naroaxin jihi cjoago na que ján ndoa, co jehe  
na ndattjo na na ján na de ixin vida naroaxin jihi.

<sup>4</sup> Co Dios mismo joinchese gurá joajna de ixin vida  
naroaxin jihi ixin jehe cjoago tsje señal co milagro  
co icha cosa que jointheadmirá chojni. Co cai jehe

Dios rroán na Espíritu Santo, tti chjá na cada na jeje tipo de joachaxin inchin jehe rinao.

*Jesucristo vayá na para sontte na inchin xanchó jehe*

<sup>5</sup> Dios chjehe joachaxin cain ángel para que jehe tsetonha ngain mundo que tsí, de jehe tti mundo que janha na tenichja na. <sup>6</sup> Sino que ngain ná parte de tti jitaxin Palabré Dios, nttiha ndačo: Oh Dios, ¿quedonda soixin xaxaon de ixin chojni? O ¿quedonda soixin anto ta joachjaon de ixin chojni ngataha nontte nttihi?

<sup>7</sup> Para nchion tiempo, soixin chjehe chojni icha tsjehe joachaxin que cain ángel, pero cottimeja soixin chjehe na xajeho gloria que soixin chonda, co joinchesayehe na, co chjehe na joachaxin para que jehe na ttetonhe na cain cosa que soixin joinchechjian.

<sup>8</sup> Co soixin chje chojni joachaxin ngain cain cosa mé.

Jañá are Dios joanjo cain joachaxin ngain chojni para cainxin cosa, Dios cointtoeha ni ná cosa que sitticaonha ngain chojni. Pero masqui jamé, xa doconha na que cain cosa ditticaon ngain na.

<sup>9</sup> Pero ján na chonxin na de ixin Jesús, que Dios chje icha tsjehe joachaxin que cain ángel para nchion tiempo. Ixin Dios anto rinao cainxin chojni, mexinxin jehe joanjo Jesús para que ndavenhe para ixin cainxin na ján na. Co jai Dios chje jehe gloria co nchesayehe ixin jehe ndavenhe masqui anto tanguí.

<sup>10</sup> Cainxin cosa que te ngain mundo jiji, te para ixin Dios co cain cosa mé te ixin Dios

joinchechjian; co Dios rinao que cainxin chojni que ocjan na chojni jehe rrochonda na parte ngain glorié jehe. Mexinxin Dios joinao que Xenhe Jesucristo anto tanguí conhe Xan para que jehe Jesucristo vačhje ná chojni jian, jamé jehe nchao ttjenguijna chojni para rrochonda na iná vida naroaxin. <sup>11</sup> Ixin cain ján na xo ocoroa na, conixin jehe tti jointtaroa na xajeho nacoa Ndodá na chonda na. Mexinxin Xenhe Dios, Jesucristo, tosoeha de ncheguinhí ján na xanchó jehe. <sup>12</sup> Inchin jehe ndačo ngain tti jitaxin Palabré Dios:

Janha rronichja de ixin soixin ngain xanchian, co rrotsje na himno para ixin soixin, janha conixin icha chojni ngain nihngo.

<sup>13</sup> Cai ndačo ngain tti jitaxin Palabré Dios:

Janha rrochonda confianza ngain Dios.

Co ndačo ngain iná parte:

Janha ntthi rrihi, conixin cain chjan que Dios chjana.

<sup>14</sup> Cain chjan mé chojni que chonda nntao co jni. Mexinxin Jesús cjoí chojni cai que chonda nntao co jni para que jehe nchao ndavenhe co jamé joinchexante tti vechonda joachaxin para navagoenxon chojni, co mé rročo inchínji. <sup>15</sup> Co jamé Jesús joanjo libertad ngain cain tti chojni que anto xaon na ixin ndasenhe na ixin chojni mé te na inchin esclavo ngain joaxaon mé ngoixin vidé na. <sup>16</sup> Ixin seguro que Jesús joiha para joicjenguijna cain ángel, sino que Jesús joí para joicjenguijna cain chojni Abraham. <sup>17</sup> Co para que jehe joinchehe jamé, jehe chonda que cjoí chojni inchin cain xanchó jehe, para que jehe

nchao ttiaconoehe cain ján na co para ixin ján na joiguehe ná jian dána ngattoxon con Dios. Co jamé jehe nchao joincheroa cain chojni de tti jianha que nchehe na de ixin tti anto tangui conhe jehe. <sup>18</sup> Co ixin jehe mismo tangui conhe co vitaha de rrojinchehe cosa jianha are ngataha nontte jihi, mexinxin jai jehe nchao ttjenguijna cain chojni que ditaha de sinchehe cosa jianha.

### 3

#### *Jesús icha importante que Moisés*

<sup>1</sup> Mexinxin, hermanos, jaha ra xo ocoroa ra ixin Dios jointtaguinhi ra chojni jehe, tsjehe ra jian ngain Jesucristo ixin jehe tti representanté Dios para ixin ján na, co jehe tti dána icha importante de ngain tti dotticaon na. <sup>2</sup> Ixin Jesús jehe vanchehe jian cain tti rinao Dios, mexinxin Dios chjé xa jihi. Inchin Moisés cai vanchehe jian cain xa que jehe vechonda para ixin chojni Dios. <sup>3</sup> Pero Jesús jiquininxin icha tsosayehe que Moisés, jañá inchin tti nchechjian ná nchia icha jiquininxin tosayehe jehe que nchia mismo. <sup>4</sup> Cada nchia chonda que tonchjian nchia de ná chojni, pero Dios jehe tti joinchechjian cain cosa que jí. <sup>5</sup> Jamé, Moisés cjoí jian ninchehe xé Dios ngayé chojni Dios. Co jehe chonda xa de vandache chojni de ixin quehe rrojinchehe Dios después ngain na. <sup>6</sup> Pero Cristo, ixin jehe Xenhe Dios, jehe chonda joachaxin de ttetonhe chojni Dios, co mé ján na mismo, si ján na ndoa sonttoho na sigue jian sotticaon na co si rrochonda na confianza ngain jehe cainxin tiempo hasta ndasenne na co si sonttoho

na sigue çhjoin tsonoa na ixin techonha na tti jian que sayé na de ngain Dios.

*Dios rinao que chojní jehe sinchejogaha*

<sup>7</sup> Mexinxin ndaço Espíritu Santo ngain tti jitaixin Palabré Dios:

Jai, si jaha ra ttinhi ra tti ndaço Dios,

<sup>8</sup> dintteha ra cha de ngain ansean ra, inchin vintte tti chojni judío que vitticaonha na tti tte-tonha Dios.

co jehe na joinao na viconxin na paciencié Dios are vacji na ngagaha jna tti xonhi chojni jí.

<sup>9</sup> Mexinxin ndaço Dios ngain Palabré:

Nttiha nigoelitoa ra xançhjen vaquenaxin na prueba

masqui vicon na cain cosa que janha jointtaha ngoixin tti cuarenta nano que jehe na sacjoi na nttiha.

<sup>10</sup> Mexinxin janha coñaho ngain chojni mé,

co ndaçhjan: “Cain tiempo ndadiguitján na de ngain ansén na,

co rinaoha na datsoan na tti nttiha que janha tjagoa na.”

<sup>11</sup> Mexinxin, janha coñaho ngain na co ndattjan na conixin ná juramento,

que ixin jehe na çhoha rroguiji na tti rrojinchejogaha na conixin janha.

<sup>12</sup> Hermanos, ttjiho ra cuidado que ni ná de jaha ra rrochondaha ra ansean ra jianha que sachjendehe Dios que jichon, co isitticaonha ra ngain jehe. <sup>13</sup> Sino que cada nchanho ncheanimá chó ra, ná ra co ná ra are xa jí tiempo, para que ni

ná de jaha ra sitticaonxinha ra ngain cosa jianha, co ansean ra tsochaha para ngain Dios. <sup>14</sup> Ixin si

ján na sonttoho na sigue hasta ndasenhe na, de rrochonda na tti confianza que ján na techonda na desde are nacoexinxon na gotticaon na, cottimeja ján na rrochonda na parte ngain Cristo.

<sup>15</sup> Jañá ndačo ngain tti jitaxin Palabré Dios:

Jai, si jaha ra ttinhi ra tti ndačo Dios, dintteha ra cha de ngain ansean ra inchin vintte tti chojni que vitticaonha na tti ttetonha Dios.

<sup>16</sup> Co, ¿quexehe tti chojni que coinhi na tti ndačo Dios co después vitticaonha na? Mé cjoí cain tti chojni judío que Moisés joantsjexin de ngain nonttehe Egipto. <sup>17</sup> Co ¿quensen Dios coñao ngain ngoixin tti cuarenta nano? Mé ngain tti xajeho chojni judío que joinchehe jianha, tti chojni que ndavenxin ngagaha jna tti xonhi chojni jí. <sup>18</sup> ¿Co quensen ngain tti ndačo Dios conixin ná juramento que čoha tsji na tti rrojinchejogaha na ngain Dios? Mé ngain xajeho chojni judío que vitticaonha tti ttetonha Dios. <sup>19</sup> Mexinxin ján na ttinxin na que jehe na čoha joiji na nttiha ixin jehe na vitticaonha na Dios.

## 4

<sup>1</sup> Mexinxin jai que ján na xa chonda na oportunidad de tsjin na sinttojogaha na ngain Dios, chonda que rrochonda na cuidado, no sea que čonja de jaha ra čoha tsji ra sinchejogaha ra ngain Dios. <sup>2</sup> Ixin ján na cai coinhi na tti joajna ndoa que danjo iná vida nara, inchin jehe na cai coinhi na. Pero para ixin jehe na xonhi xé que jehe na coinhi na mé, ixin masqui coinhi na, jehe na vitticaonha na. <sup>3</sup> Pero ján na xo ogotticaon na, ján na tti tsjin na sinttojogaha na ngain Dios. Pero



para ixin tti chojni que vitticaonha Dios, para ixin jehe na conhe inchin ndačo Dios ngain tti jitaxin Palabré:

Mexinxin janha coñaho ngain na co ndattjan na conixin ná juramento,

que ixin jehe na čoha rroguiji na rrojinchejogaha na nganji na janha.

Pero ixinha jamé, jí lugar tti chojni nchao sinchejogaha ngain Dios ixin jehe ojinchejogaha desde are jehe joehe xé de joinchechjian mundo.

<sup>4</sup> Ixin ngain ná parte de tti jitaxin Palabré Dios ndačo janhi de ixin tti yatoxin nchanho:

Dios joinchejogaha ngain nchanho yatoxin de cain xa que jehe joinchehe.

<sup>5</sup> Co ngain iná parte jitaxin janhi:

Sijiha na sinchejogaha na nganji na janha.

<sup>6</sup> Co chojni mé que saho coinhi na tti joajna ndoa que danjo iná vida nara, joiijiha na joinchejogaha na ngain Dios, ixin jehe na vitticaonha na joajna mé. Pero te icha chojni que ján siji sinchejogaha ngain Dios. <sup>7</sup> Ixin tsje nano después de tti tiempo mé Dios cjan coín iná nchanho, co nchanho mé, jai. Co Dios joinchenichja David janhi de ixin nchanho jai inchin jitaxin ngain Palabré Dios:

Jai si jaha ra ttinhi ra tti ndačo Dios, dintteha ra cha de ngain ansean ra.

<sup>8</sup> Si Josué rroganjo ngain chojni Israel oportunidad jiji de rrojinchejogaha na ngain Dios are joiiji na nonttehe Canaan, Dios irrocjanha rroganjo iná nchanho después. <sup>9</sup> Mexinxin jiji rročo ixin xa dittohe oportunidad para que chojni Dios sinchejogaha na jian ngain jehe. <sup>10</sup> Ixin tti chojni que nchejogaha ngain Dios, chojni mé

nchejogaha de cain xé que jehe joinchehe, jañá inchin joinchejogaha Dios are joexin joinchehe xé.

<sup>11</sup> Mexinxin, ján na chonda na que rrotsjehe na quexén sinttoho na para que tsjin na sinttojogaha na ngain Dios, co tsjiho na cuidado que ní ná na sonttoha na inchin joinchehe cain tti chojni que vitticaonha tti ttetonha Dios.

<sup>12</sup> Ixin palabré Dios jichon co chonda joachaxin. Palabra mé icha yao que cain espada que chonda filo de yoixin lado. Co inchin espada nchao dattodoho hasta quexeho parte de cuerpoe ni, jamé palabré Dios dattodoho ngain almé co ngain espirítue ni. Co palabra mé tti jian nchenohe ni tti xaxaon ni co tti rinao ansén ni sinchehe. <sup>13</sup> xonhi cosa jí que Dios joinchechjian que nchao sema de ngain jehe. Para ngattoxon con Dios cain cosa jíxago, co ján na rrochonda na que rrondaço na ngain jehe cain tti jointtoho na.

### *Jesús jehe tti dána icha importante*

<sup>14</sup> Jesús, tti Xenhe Dios, mé tti dána icha importante para ixin ján na, co jehe tti cjoí joiguehe tti ttjen Dios. Mexinxin, ján na chonda na que sonttoho na sigue sotticaon na inchin ttetonha Dios.

<sup>15</sup> Co jehe tti dána icha importante para ixin ján na, mé tti nchao tsiacóná na ján na are jianha dotticaon na ixin jehe cai anto joitaha de rrojinchehe cain tipo de cosa jianha, pero jehe xonhi tiempo joinchehe ni ná cosa jianha. <sup>16</sup> Mexinxin, ján na tsonchienhe na ngain tti ttjen Dios co rroxaonha na ixin jehe Dios anto rinao na, co jehe tsiacóná na ján na co tsjenguijna na are ján na tangui tsoan na.

## 5

<sup>1</sup> Cada dána icha importante para ngain chojni judío joixin de ngayé chojni judío, co Dios ttinchiehe jehe para que jehe sehe representanté Dios para ixin chojni mé, co para que dána mé saquehe cosa de ofrenda ngain alté Dios para que Dios sinchetjañehe chojni tti jianha que jehe na joinchehe na. <sup>2</sup> Co ixin jehe dána mé nchehe cosa jianha inchin cain chojni, mexinxin jehe nchao rochonda paciencia ngain tti chojni que tsjeha chonxin de ixin Dios co ngain tti chojni que ncheha jian. <sup>3</sup> Co ixin dána mé cai nchehe cosa jianha, mexinxin jehe chonda que danjo cosa para ngain Dios para que Dios sinchetjañehe tti jianha que jehe joinchehe cai, xajeho inchin nchehe para que Dios sinchetjañehe tti jianha que nchehe cain chojni.

<sup>4</sup> Xonhi chojni siguehe dána icha importante de ixin jeha mismo, sino que Dios tti nchegayé chojni mé joachaxin jihi, inchin conhe ngain Aarón tti cjoí saho dána. <sup>5</sup> Co jañá conhe ngain Cristo cai; jehe vinha dána icha importante ixin jeha joinao, sino que Dios joinchegayé joachaxin mé; inchin Dios ndačo ngain Cristo:

Jaha tti Xanhna;  
janha tti chjaha vida jai.

<sup>6</sup> Cai ndačo Dios ngain Cristo ngain iná parte de tti jitaxin Palabré Dios:

Jaha ná dána para cainxin tiempo,  
co jaha xajeho clase de dána inchin Melquisedec.

<sup>7</sup> Are Cristo vehe ntthi ngataha nontte, jehe anto joinchecoanxinhi Dios co anto joinchetsenhe ñao Dios, co are joinchehe jamé, jehe nichja soji co

hasta joinchequinga ndacon para ngain Dios tti chonda joachaxin para que rrocančhlandaha Jesucristo para ndarroguenhe. Co Dios coinhi cain tti ndačo Cristo ixin jehe Cristo anto vanchesyayehe Dios. <sup>8</sup> Mexinxin Cristo masqui jehe Xenhe Dios, jehe coangui vitticaon joinchehe cain tti tetonha Dios de ngain tti anto tangui que conhe. <sup>9</sup> Co después que Cristo jañá vačhje anto jian, are mé jehe nchao danjo iná vida naroa que xonhi tiempo tsjexin ngain cain chojni que ditticaon ngain jehe. <sup>10</sup> Ixin Dios tti joincheguinha Jesucristo tti dána icha importante, co ndačo ixin jehe xajeho clase de dána inchin Melquisedec.

*Tti anto tangui que jí si tsinttohe ni tti confianza que chonda ni ngain Cristo*

<sup>11</sup> Janha na xa chonda na tsje que rrondattjo ra de ixin asunto jihi, pero atto tangui para rrondattjo ra ixin jaha ra rinaoha ra ttinxin ra. <sup>12</sup> Ovatto tsje tiempo que jaha ra ditticaon ra Jesucristo, co jai jaha ra onchao rrojinchecoeha ra icha chojni de ixin Cristo. Pero jai jaha ra xa dondaha ra iná chojni que rrondattjo ra iná cain cosa icha tanguiha de ixin Dios. Cjan ra anto sojiha ra de ngain tti ditticaon ra inchin ná xanletsjochjan que chonda que sihi xan tsjin en lugar de sine xan comida soji. <sup>13</sup> Co tti chojni jamé, jehe na inchin tti xanletsjochjan que tetai, rročo ixin jehe na xa ttinxinha na jian quehe rročo tti vida nao. <sup>14</sup> Co tti comida soji, mé para ixin chojni yeye, que onohé dinchiehe quexehe tti jian co quexehe tti jianha.

## 6

<sup>1</sup> Mexinxin nttoho na sigue de tangui na icha de ixin Dios para que rrocjan na inchin chojni yeye de ngain tti dotticaon na. Co tsinttohe na ná lado tti coangui na are nacoexinxon na coangui na de ixin Jesucristo, inchin queḡén ttentoxinhi ni vidé ni para isincheha ni cosa jianha que dicao ni para ngain infierno, co de queḡén sitticaon ni ngain Dios, <sup>2</sup> co de ixin quedonda chonda ni que diguitte ni, co de ixin quedonda ttín rá ni ngataha já iná chojni que ditticaon Jesucristo co nchetsenhe ñao Dios ixin jehe sinchenciaon chojni mé, co queḡén rroxechon cain chojni que ndadenhe co ixin Dios sinchejuzguehe cain chojni co rrondache na quehe tsonhe cada na para cainxin tiempo. <sup>3</sup> Ján na onoa na cain yá, mexinxin sonttoho na sigue tsangui na icha si Dios sanjo joachaxin.

<sup>4</sup> Ixin chojni que ovayé joadingasán co ochonxin na de ixin tti jian que danjo Dios, co ojí Espíritu Santo ngain na, <sup>5</sup> co oconohe na tti jian joajné Dios co ochonda na tti joachaxín Espíritu Santo que icha rroxago ngain mundo que tsí; <sup>6</sup> tti cain chojni que ochonxin na cain yá, co si rrocjan na isitticaonha na ngain Jesucristo, ni ná chojni nchao sinchearimá chojni mé para tsentoxinhi vidé na iná ixin ḡajeho inchin jehe na mismo tecjan na tettenganito na Xenhe Dios nganito cruz iná co tetjanao na Xenhe Dios ngattoxon con cain chojni. <sup>7</sup> Co cain chojni ngataha nontte inchin ná jngui que ndadihi cain ḡhin que dinttji ngataon jngui. Co Dios nchenciaon jngui mé si danjo ná cosecha jian para ixin tti chojni que nchehe

xa ngataon jngui mé. <sup>8</sup> Pero si jngui mé danjo jeho canchaha co icha ca que xonhi xé, nontte mé xonhi rentte nontte. Co Dios rrondaço que nontte mé jiquininxin rroche nontte.

*Confianzá na ngain Cristo nttasoji na para techonhe na tti jian que sanjo Dios*

<sup>9</sup> Pero masqui janha na ndaçhjan jañá nganji ra tti janha na anto rinaho na, pero janha na chonda na seguro ixin jaha ra jeha inchin tti chojni que ttinttohe na de ditticaon na ngain Cristo, sino que ixin jaha ra sayehe ra cainxin tti jian que ttí de ngain Dios ixin ditticaon ra ngain. <sup>10</sup> Ixin Dios jehe nchehe inchin jiquininxin, co jehe rrotjañeha tti jian que jaha ra joinchehe ra ni rrotjañeha que jaha ra ján ndoa rinao ra jehe Dios co mexinxin cjoenguijna ra icha chojni que ditticaon Jesucristo co ixin cain mé tenchehe ra jai cai. <sup>11</sup> Pero janha na rinaho na que cada ra jaha ra sinchehe ra sigue xajeho inchin tenchehe ra jai para que jamé Dios nchao rrochjá ra tti jaha ra techonhe ra. <sup>12</sup> Janha na rinaoha na que jaha ra tsosaha ra, sino que rroehe ra ejemploe cain tti chojni que jian ditti-caon ngain Cristo co que chonda paciencia. Ixin chojni mé tedayé na tti herencia que Dios ndaço sanjo.

<sup>13</sup> Ixin are Dios chjé promesa Abraham de ixin tti sanjo Dios, jehe joinchejurá conixin nombré jehe ixin xonhi iná nombre icha importante para rrojinchejuraxin que jeho nombré jehe. <sup>14</sup> Co Dios ndaço ngain Abraham: “Ján ndoa que janha anto sinttanchaon jaha co tsotsje xanttia xançhjen.” <sup>15</sup> Abraham chonhe mé conixin paciencia, co jamé

jehe vayé tti ndačho Dios ngain. <sup>16</sup> Are chojni nchejurá na, jehe na nchejurá na conixin iná nombre icha importante que jehe na; co are jamé nchesejurá na, ichondaha na que tjao na icha. <sup>17</sup> Mexinxin Dios joinchesejurá tti promesé jehe conixin ná juramento ixin jehe joinao cjoago claro ngain tti chojni que sayé promesé ixin jehe ján sanjo tti jehe ndačho, co xonhi cosa tsentoxinhi. <sup>18</sup> Jañá tti promesé Dios co tti juramentoe Dios yó cosa que čhoha sitoxinhi. Dios čhoha sincheyaxon de ixin cayoi cosa jiji. Co mexinxin Dios chjá na consuelo jian ján na xó conchienne na ngain jehe para que jehe tsjenguijna na, co chonda na confianza ngain promesé jehe. <sup>19</sup> Co jehe mé tti nchesoji co nchesejurá almá na inchin ancla que dečhoa ngangui jinda para nchesejurá barco. Co tti confianza que ján na chonda na ngain promesé Dios, mé tti ttenčhoa na ngain Dios tti ttjen toenxin cortiné nihngo nttiha ngajni. <sup>20</sup> Nttiha tti joixinhi Jesús icha saho para joanttjé nttiha para que ján na nchao tsjin na tti ttjen Dios. Co jañá mexinxin Jesús joiguehe para cainxin tiempo tti dána que icha importante, co jehe xajeho clase de dána inchin Melquisedec.

## 7

### *Jesús xajeho clase de dána inchin Melquisedec*

<sup>1</sup> Jehe Melquisedec cjoí rey de ngain ciudad de Salem co cjoí dána para ixin Dios que ttjen ngajni. Co are Abraham cjanxin de ngain tti guerra que Abraham cjoa cha ngain cainxin rey que jehe coetocaho, are mé jehe Melquisedec

viguetan ngatja nttiha, co nttiha Melquisedec, conixin joachaxín Dios, joinchençaon Abraham. <sup>2</sup> Co Abraham joanjo ngain Melquisedec ná ttexin parte de cainxin tti jehe joacha ngain guerra mé. Tti nombre Melquisedec, mé rrocho saho “rey que nchehe tti jian”; co ixin jehe tti rey de ngain ciudad de Salem, co ixin nombré ciudad mé rrocho “paz”, mexinxin rrocho nombré rey mé “rey que xonhi guerra ttjé.” <sup>3</sup> Co xonhi lugar jitaxin de ixin quensen cjoí ndodé ni quensen cjoí janné jehe Melquisedec, ni de ixin quensen cjoí nindogoelitoe xančhjen. Cai xonhi lugar jitaxin quesa concjihi ni quesa ndavenhe; mexinxin jehe Melquisedec nchao sonttocaninxin na Xenhe Dios ixin cai jehe Melquisedec cjoí ná dána para cainxin tiempo.

<sup>4</sup> Nchao jí remé, jai xaxaon ra de ixin Melquisedec. Jehe anto importante vehe, ixin hasta Abraham, tti cjoí ndogoelitoe xančhjen cain chojni Israel, jehe ndo mismo joanjo ndo ngain Melquisedec ná ttexin parte de cain que jehe ndo joantsjehe ndo cain rey que coetocaho ndo ngain guerra. <sup>5</sup> Ján ndoa que tsje nano después, ley que vayé Moisés ndačo que jehó xanntti xančhjen de Leví nchao doan dána. Co ley mé cai chjé dána mé joachaxin de sinhecobrá ngain chojni Israel ná tti ttexin parte de cain cosa que jehe na chonda na, masqui cain jehe na co xidána mé xajeho razé co chojni Abraham. <sup>6</sup> Pero Melquisedec masqui jehe jeha razé Leví, pero jehe vayé tti ttexin parte de tti joacha Abraham. Co jañá Melquisedec joinchençaon Abraham, tti vayé promesé Dios. <sup>7</sup> Co cain chojni nohe na que ná tti nchençaon



ná cosa o ná chojni, mé tti icha importante que tti tonchaon. <sup>8</sup> Co nttihi ngayá na ján na, dána que dayé ttexin parte, chojni mé jai xa denhe na. Pero tti jitaxin Palabré Dios nichja de ixin Melquisedec inchin ná chojni que xa jichon. <sup>9</sup> Co cai nchao rrondačo ni que Leví co cain dána razé Leví, que jai nchecobrá tti ttexin parte de cain cosa que chonda chojni Israel, cain nimé cai cjoenga na hna tti ttexin parte ngain Melquisedec ngain rato are Abraham cjoenga hna tti ttexin parte ngain Melquisedec. <sup>10</sup> Ixin are mé rročo que Abraham ojoicao cain razé mé ngain cuerpoe, masqui are mé jehe na xa toncjiha na are Melquisedec joiguetanxin Abraham ngatja nttiha.

<sup>11</sup> Cain chojni Israel vayé na ley pero de ngain dána razé Leví, co cain dána mé xanntí xančhjen Aarón, tti saho dána. Pero ley que dána ndache chojni, ley mé xonhi joachaxin chonda para nchejian chojni ngattoxon con Dios. Mexinxin chonda que joí iná dána; nahi dána que chonda joachaxin inchin Aarón, sino que ná dána que chonda joachaxin inchin Melquisedec. <sup>12</sup> Ixin si ditoxin clase de dána, cai ley chonda que ditoxin. <sup>13</sup> Co tti iná clase de dána, mé Jesucristo, tti chonda cain joachaxin para ixin ján na. Co jehe Jesús jeha razé Leví, sino que jehe joixin razé Judá. Co xonhi tiempo ná tti razé Judá cjoí dána. <sup>14</sup> Ixin anto jian nohe ni que Jesucristo joixin razé Judá, co Moisés xonhi ndačo de ixin jehe raza jihí are jehe nichja de ixin cain dána.

<sup>15</sup> Co jihí icha claro para tsinxin na are noa na ixin tti dána naroaxin que joicononxin, mé inchin Melquisedec. <sup>16</sup> Ixin Jesús cjoí dána mé pero jeha

inchin coetonha ley, ixin ley ndačo jehó chojni razé Leví nchao soan na dána. Rročo que Jesús cjoí dána pero ixin jehe chonda joachaxin para sechon cainxin tiempo. <sup>17</sup> Ixin Dios ndačo janhi de ixin jehe:

Jaha ná dána para cainxin tiempo, co jaha xajeho clase de dána inchin Melquisedec. <sup>18</sup> Jañá, mexinxin tti ley que vayé chojni are saho, icoha jai ixin čhoha cjoenguijna chojni co xonhi rentte ley mé. <sup>19</sup> Rročo que tti ley que vayé Moisés čhoha nchejian ni ná chojni. Co jai en lugar de ley mé, chonda na confianza ngain Jesucristo; co de ixin confianza mé, ján na nchao tonchienne na ngain Dios.

<sup>20</sup> Co Dios ndačo conixin ná juramento que ixin Jesucristo, mé tti dána jai. <sup>21</sup> Tti icha dána vintteguinhi dána pero sin ni ná juramento de Dios. Pero are Jesucristo vinhi dána, Dios joinchejurá, ixin ngain tti jitaxin Palabré Dios ndačo:

Dios joinchejurá, co tsentoxinha tti jehe ndačo:

“Jaha ná dána para cainxin tiempo, co jaha xajeho clase de dána inchin Melquisedec.”

<sup>22</sup> Mexinxin Jesús jehe tti joinchesejurá nganji na tti trato naroaxin jiji que mé icha jian que tti trato saho. <sup>23</sup> Tsje chojni vintte na de dána, ixin are ná dána ndadenhe, iná xí dehe xa de dána, co jañá ni ná xidána mé nchao nchehe sigue xé para cainxin tiempo. <sup>24</sup> Pero ixin Jesús jehe xonhi tiempo senhe, mexinxin jehe xonhi tiempo sanjo xé de dána que jehe chonda ngain iná chojni. <sup>25</sup> Mexinxin Jesús jehe nchao danjo iná vida naroaxin que xonhi tiempo tsjexin ngain cain tti

chojni que tonchienne ngain Dios por ixin jehe Jesucristo, ixin jehe jichon para cainxin tiempo para que nchetsenhe ñao Dios para ixin jehe na.

<sup>26</sup> Mexinxin Jesucristo, jehe tti mero dána icha importante que ján na rrogondá na. Ixin Jesús jehe joxon jian ngattoxon con Dios, jehe xonhi cosa nchaoha ni jianha joinchehe. Jehe vačhjenjehe chojni que nchehe jianha, co saccoajinhi icha noi que ngajni. <sup>27</sup> Icha dána chonda que doen coxigo para daquehe jní va ngain alté Dios cada nchanho. Saho nchehe mé para ditjañehe cain tti jianha que jehe joinchehe; cottimeja para ditjañehe cain tti jianha que joinchehe icha chojni. Pero Jesús chondaha que nchehe jamé ixin jehe xanjo venhe nacoa nttiha para vitjañenxin cainxin tti jianha que nchehe cain chojni co mé donda para cain tiempo. <sup>28</sup> Ley que vayé Moisés ncheguinhí dána icha importante xí que teca tsje cosa jianha que joinchehe. Pero tti juramento que Dios ndačho después de ley mé, juramento mé tti ncheguinhí Xenhe Dios dána icha importante, co jehe Xan ni ná cosa jianha joincheha Xan.

## 8

### *Jesús jehe tti abogado de ngain tti trato naroaxin*

<sup>1</sup> Tti cosa icha importante que janha na tendačhjan na, mé janhi: tti dána que icha importante para ixin ján na, jehe joxon jian, co sajoiguehe ngain lado jian de tti retaha Dios nttiha ngajni.

<sup>2</sup> Co nttiha ngajni jehe jinchehe xa de dána ngain tti mero ningoe Dios nttiha; co Dios, tti chonda

cain joachaxin, mé tti joinchechjian nihngo mé, co jeha chojni tti joinchechjian. <sup>3</sup> Co cain icha dána que icha importante vinchiehe na para que jehe dána mé saquehe cosa co nntaohe coxigo ngain altar para ixin Dios. Co mexinxin rrogonda que Jesucristo cai vanjo cosa para ixin Dios. <sup>4</sup> Si jehe Jesucristo xa rroguehe nntihi ngataha nontte, jehe ni rrogueha de dána ixin jai xa te dána que daquehe cosa para ixin Dios inchin ttetonha ley que vayé Moisés. <sup>5</sup> Pero tti nchehe cain dána nntihi ngataha nontte, jeha inchin ná copia o inchin sanho de cain cosa que jí ngajni. Ján na noa na que ixin mé jeha inchin ná copia de lo que tti jí ngajni ixin icha saho que Moisés joinchechjian ningoe Dios, jehe Dios ndačo ngain Moisés: “Ttjiho cuidado co nchechjian nihngo ngataha nontte xajeho inchin janha cjoagoha are ngagaha jna.” <sup>6</sup> Pero Jesucristo, tti dána icha importante para ixin ján na, co jehe mé chonda icha jian xa de dána que cain dána nntihi ngataha nontte ixin Jesucristo jehe tti abogado de ngain ná trato icha jian que trato saho. Co promesé Dios para nganji na ngain trato naroaxin jiji, mé anto icha jian promesa que promesa vehe ngain trato saho.

<sup>7</sup> Ixin si tti saho trato nchao rojinchejian chojni ngattoxon con Dios, irrogondaha rroconchjian tti trato yoxin. <sup>8</sup> Pero Dios vicon que chojni jehe vintteha na jian, mexinxin Dios ndačo janhi de ixin jehe na ngain tti jitaxin Palabré:

Dios ndačo: Tsí nchanho

que janha sinttachjian iná trato naroaxin ngain chojni de Israel, co ngain chojni de Judá.

<sup>9</sup> Ijeha inchin trato que janha jointtachjian ngain nigoelitoe na xančhjen, are janha tsá rá na para joantsjexin na de ngain nonttehe Egipto, pero jehe na joincheha na inchin ndačo trato mé, co mexinxin janha ijointtaha na caso, jañá čo Dios.

<sup>10</sup> Tti trato que janha sinttachjian ngain chojni Israel ngain nchanho que tsí, janhi rročo trato mé, čo Dios:

Janha tsín tti janha ttetonha ngain joarrixaoen na, co tti janha ttetonha ndasittohe ngain ansén na.

Cottimeja janha sarihi Dios de jehe na, co jehe na sintte na chojnina janha.

<sup>11</sup> Co irrochondaha que iná chojni sinchecoenhe iná chojni;

irrochondaha que ná chojni sinchecoenhe compañeroe, o ni xanchó para que rrochonxin na de ixin janha, tti Dios de jehe na,

ixin cainxin na rrochonxin na de ixin janha, desde xannchinnchinchjan hasta ni icha ojonchjan.

<sup>12</sup> Co janha sinttatjañá na cain tti jianha que nchehe na,

co ixonhi tiempo janha rroaxanho de cain cosa jianha que jehe na joinchehe na.

<sup>13</sup> Are Dios nichja de ixin iná trato naroaxin, rročo ixin jehe ondačo que tti saho trato ondaconttaxí. Co cosa que ondaconttaxí iseha donda, co otoin ndasitján.

## 9

*Tti nihngo nttihi ngataha nontte co tti nihngo nttiha ngajni*

<sup>1</sup> Tti saho trato vaquetonha ngain chojni quežén vanchecoanxinhi na Dios, pero de ngaxinhi ná nihngo nttihi ngataha nontte. <sup>2</sup> Co nihngo jihi janhi conchjian: tti saho cuarto vinhi Lugar Santo, co nttiha vehe tti candeléro de yáto rá, co ná mesa tti vetaha niottja que vaganjo na para ngain Dios. <sup>3</sup> Co toenxin tti manta ngain yoxin puerta, vehe iná cuarto que vinhi Lugar Santísimo. <sup>4</sup> Nttiha vehe ná altar de oro tti vachetaxin tsjoca para ixin Dios, co nttiha cai vehe ná caja co ngama caja mé veyá joxon oro. Co ngaxinhi caja mé vehe ná chichjan de oro que veringa nchion maná, co nttiha cai vengá nttacottohe Aarón, tti nttá que čhima retoño, co nttiha cai vengá tti tabla de žo que vetaxin tti saho trato. <sup>5</sup> Co ngataha caja mé vintte dibujoe yó ángel que dinhi querubines, co mé rročo lugar tti ttjen Dios. Co jehe dibujoe ángel mé conixin nenechán vacjanotaon ngataha caja mé tti vanchetjañenxin Dios chojni tti jianha que vanchehe na. Pero janha na jai irrondattjoha ra icha de ixin cain cosa jihi.

<sup>6</sup> Jañá vintte cain cosa ngain nihngo mé, co dána vaguintteguixinhi cada nchanho tti saho cuartoe nihngo mé para que nttiha vanchecoanxinhi Dios. <sup>7</sup> Pero ngain tti yoxin cuartoe nihngo mé, nttiha vaguixinhi jeho tti dána icha importante, co jeho nacoa nttiha cada nano. Co are dána mé vaguixinhi nttiha, jehe chonda que vaguicao jní coxigo para vaganjo ngain Dios para

que Dios vanchetjañehe tti jianha que joinchehe dána mé, co tti jianha que joinchehe icha chojni. <sup>8</sup> Conixin cain jiji Espíritu Santo nntaquiánxin na, que masqui icha dána co chojni nchao nchegonda cuarto saho para vanchecoánxin na Dios, jehe na vechondaha na joachaxin para vaguixinhi na tti yoxin cuarto que vinhi Lugar Santísimo. <sup>9</sup> Cain jiji inchin ná ejemplo para ixin ján na jai ixin tti cosa co nntaohe coxigo que nntiha vaganjonxin na ngain Dios, cain mé çhoha sinchejian ansén cain chojni que nchesayexin Dios jañá. <sup>10</sup> Ixin cain mé jehó inchin canxion regla que vinttechonda na de ixin quexehe cosa nchao jine na co quexehe cosa nchao dihi na, co queçén jiquininxin ncheroa cuerpoe na. Co cain cosa mé jehó chonda joachaxin hasta que Dios joinchechjian iná trato naroaxin.

<sup>11</sup> Pero ojoí Cristo, co jai jehe tti dána icha importante que ttjenguijna na para sayé na cain cosa jian que Dios rroanha ngain chojni jehe. Ngain nihngo tti jehe jinchehe ça de dána, nihngo mé tti icha importante co icha jian. Co nihngo mé jeha chojni joinchechjian, rroçho que nihngo mé jiha ningo ngataha nontte jiji. <sup>12</sup> Cristo jehe tti ndoa joixinhi ngain tti Lugar Santísimo nntiha ngajni pero jeha para joiganjo jni cochivatochjan co jni coxinttachjan, sino jehe joanjo jni jehe mismo. Co jañá jehe joixinhi nntiha nacoa nntiha co mé gonda para cainxin tiempo, co jamé jehe nchao chjá na iná vida naroaxin que çonhi tiempo tsjexin. <sup>13</sup> Já nnti ndoa que jni coxinttá co jni cochivatochjan co nchonhi nntaohe coxinttachjan que chexin ngataha altar, vinttjite ngataha tti chojni que

joincheha inchin ttetonha ley que vayé Moisés. Co janá cain mé chonda joachaxin de joincheroa cuerpoe chojni, pero ansén nahi. <sup>14</sup> Si cain mé jañá chonda joachaxin, ¡mexinxin jní Jesucristo chonda icha joachaxin! Co de ixin Espíritu Santo tti xonhi tiempo ndasenhe, Cristo mismo joanjo cuerpoe ngain Dios co Cristo joxon jian; xonhi jianha chonda jehe, co jní Jesucristo ncheroa ansean na de cain cosa jianha que nchetján chojni. Jamé para que ján na nchao sonttoho na inchin rinao Dios que jichon.

<sup>15</sup> Mexinxin Jesucristo jehe tti abogadoa na de ngain tti trato o testamento naroaxin. Jesucristo ndavenhe para que vitjañehe cain cosa jianha que joinchehe chojni ngain trato que vehonda joachaxin icha saho, co para que tti chojni que Dios coinchiehe nchao sayé na tti iná vida naroaxin para cainxin tiempo, que jehe Dios ndačo sanjo. <sup>16</sup> Ixin nttihi ngataha nontte are dittohe ná testamento, mé tti ndačo quehe tsonhe cain cosé chojni que ndavenhe. Co para que chojni familié sinchehe na inchin jindačo ngain testamento mé, chonda na que tsjago na ná xón, que chojni mé ndoa ndavenhe. <sup>17</sup> Ixin ná testamento xonhi rentte si xa jichon tti joinchexjian testamento mé, sino que are ndadenja tti nchexjian testamento. <sup>18</sup> Mexinxin Dios are vaguehe tti saho trato chonda que vinttji jní coxigo. <sup>19</sup> Jihi tti conhe: Moisés ndache cain chojni cain tti ttetonha ley que jehe vayé. Cottimeja jehe coá ná ramé nttahisopo co coencjin nnta chjon jatse, co xanguí ngain jní coxinttachjan co cochivatochjan co tettecjan jni



jinda, co cointtjitte ngataha tti libro que jitaxin ley que jehe vayé co cai cointtjitte jni mé cain chojni. <sup>20</sup> Cottimeja ndačo ngain na: “Jihi tti jni que nchese gurá trato que Dios coetonha para ixin jaha ra.” <sup>21</sup> Co Moisés cai cointtjitte jni nganito nihngo, co cain cosa que vagonda ngaxinhi nttiha para vacocoanxin Dios. <sup>22</sup> Co inchin jitaxin ley mé, merocoa cain cosa chonda que toroa conixin jni; co Dios čhoha sinchetjañehe ná cosa jianha si diguinttjitteha jni.

*Tti tangui que Cristo vetan, mé jointtatjañanxin na Dios cain tti jianha que jointtoho na*

<sup>23</sup> Jañá que cain cosa yá vagondehe jní coxigo para vacoroaxin, co cain cosa mé jehó ná copia de cain cosa que jí ngajni. Pero cain cosa que tequinixin ngajni, mé gondehe icha jian jni que jní coxigo para coroaxin, co mé jní Jesucristo. <sup>24</sup> Ixin Cristo jehe joixinha ngaxinhi nihngo que chojni joinchechjian, que lugar mé jehó ná copia de nihngo mero ndoa, sino que Cristo joixinhi mero ngain nihngo que jí ngajni tti jai jehe jinchetsenhe ñao Dios para ixin ján na. <sup>25</sup> Tti dána judío icha importante vixinhi ngaxinhi nihngo ngain Lugar Santísimo nacoa nttiha cada nano para joiganjo jni que jeha jní jehe. Pero Cristo xanjoha tsje nttiha para ndadenhe. <sup>26</sup> Ixin si jamé rroconhe, jehe Cristo rrochonda que rrogenhe anto tsje nttiha desde que nontte conchjian. Pero tti conhe que jai are ochian ndajittjexin mundo, Cristo xago co joanjo cuerpoe mismo ngain Dios para cjoenga hna cain tti jianha que nchehe chojni. Co mé conhe nacoa nttiha co donda para cainxin tiempo.

<sup>27</sup> Jañá inchin cain chojni chonda que senhe na para nacoa nttiha, cottimeja Dios sinchejuzgá ngain na, <sup>28</sup> jañá cai Cristo xanjo venhe para nacoa nttihi para que cjoenga hna cain tti jianha que nchehe chojni ngataha nontte jihi. Después jehe rrořago nttia yoxin, pero ijeha para sicjenga hna tti jianha que nchehe chojni, sino que para sichjé iná vida naroaxin cain chojni que otechonhe jehe.

## 10

<sup>1</sup> Tti ley que vayé Moisés cjoí jehó inchin ná sanho de cain cosa jian que tsí co tjagoha claro quexén sintte cain cosa mé. Co masqui chojni que vaconchienne ngain Dios vaganjo na tsje cosa ngain jehe, pero ley jihi xonhi tiempo joinchejian ansén chojni mé ixin nano co nano vaganjo na xajeho cosa. <sup>2</sup> Ixin si ley mé nchao rrojinchejian ansén jehe na, cain cosa que vaganjo na para ixin Dios, irroganjoha na nanao. Ixin cain tti chojni que vaganjo cain cosa mé, are jehe na orrocoroa na para cainxin tiempo de cain tti jianha que joinchehe na, jehe na irroconoeha na feo de ixin tti jianha que joinchehe na. <sup>3</sup> Jañá rrořho que cain cosa que vaganjo na, cosa mé jehó para vancheřaxaon na cain tti jianha que jehe na nchehe na cada nano, <sup>4</sup> ixin jní coxinttá co jní cochivatochjan xonhi tiempo nchao rroxengaxin hna cain tti jianha que nchehe chojni.

<sup>5</sup> Mexinxin are Jesucristo joí ngataha nontte jihi, jehe ndařho ngain Dios:

Soixin irinaoha tti nntaohé coxigo ni icha cosa que chojni chjá,

mexinxin soixin joinchechjian ná cuerpo para ixin janha.

<sup>6</sup> Soixin nntaxoxianha nntaohe coxigo que che ngataha xohi ni icha cosa que chojni nchehe na para nchetjañenxin na tti jianha que jehe na nchehe na.

<sup>7</sup> Mexinxin janha ndačhjan: “Nttihi joihi janha para sinttaha inchin soixin rinao, oh Dios, jañá inchin jitaxin de ixin janha ngain libroe Moisés.”

<sup>8</sup> Cristo saho ndačo que Dios joinaoha ni joincheoxinha cain cosa que vaganjo chojni, ni coxigo que vaganjo chojni, ni nntaohe coxigo que vacjaga chojni para ixin Dios, para vitjañenxin na tti jianha que nchehe na. Jamé ndačo Cristo masqui cain cosa mé ley que vayé Moisés coetonha para que vanjo na. <sup>9</sup> Cottimeja Cristo ndačo: “Nttihi joihi janha para sinttaha inchin soixin rinao, oh Dios.” Rročo que jehe jói para vinttjian cain cosa que vaganjo chojni, co jehe vanjo iná cosa que icha jian. <sup>10</sup> Dios ojointtajian na ixin Jesucristo joinchehe inchin rinao Dios are Jesucristo joanjo cuerpoe jehe mismo para ngain Dios. Co jehe joinchehe jihi nacoa nttiha, co mé donda para cainxin tiempo.

<sup>11</sup> Cain xidána judío vanchehe xa xé xa cada nchanho, co vaganjo xa tsje nttiha xajeho cosa ngain Dios masqui cain cosa mé xonhi tiempo nchao cjoenga hna cain tti jianha que vintteca chojni. <sup>12</sup> Pero Jesucristo joanjo jehó nacoa cosa ngain Dios para cainxin tiempo, co mé cuerpoe para cjoenga hna cain tti jianha que nchehe chojni. Cottimeja Jesucristo sajoiguehe ngain lado

jian de Dios. <sup>13</sup> Nttiha jichonhe Jesucristo hasta tti nchanho que Dios sinchegacha jehe de ngain cain tti ningaconhe. <sup>14</sup> Ixin de tti nacoaxinxon nttiha que jehe xanjo ndavenhe para Dios jehe joinchejian para cainxin tiempo cainxin chojni que tequininxin para ngain Dios. <sup>15</sup> Co Espiritu Santo nttasegurá na cain jihi ixin saho ndačo:

<sup>16</sup> Janhi sehe tti trato que janha sinttachjian ngain chojni ngain tti nchanho que tsí, čo Dios que chonda cain joachaxin.

Tsín tti ttetonha janha ngain ansén na, co tti janha ttetonha ndasittohe ngain joarrixaoen na.

<sup>17</sup> Cottimeja ndačo:

Ixonhi tiempo janha rrořaxanho de cain cosa jianha que jehe na nchehe na.

<sup>18</sup> Jañá mexinxin are cain tti jianha que vintteca chojni ovitjañehe na, ichondaha na que sanjo na icha cosa ngain Dios para sitjañenxin na cain cosa jianha mé.

### *Ján na chonda na que tsonchián na ngain Dios*

<sup>19</sup> Mexinxin hermanos, jai ján na nchao soxinhí na conixin confianza ngaxinhí tti Lugar Santísimo nttiha ngajni ixin Jesucristo ocointtji jni para ixin ján na. <sup>20</sup> Are Jesucristo vanjo cuerpoe para ndavenhe, are mé rročo ixin cortina para ngain Lugar Santísimo xiré cortina para que ján na nchao satto na cortina mé co tsjia na ngain ná nttiha naroaxin que danjo iná vida que xonhi tiempo tsjexin. <sup>21</sup> Jehe Jesús, tti dána que icha importante, mé tti ttjenguijna ján na nttiha tti ttjen Dios. <sup>22</sup> Mexinxin ján na chonda na que tsonchián

na ngain Dios conixin ansean na jian conixin ná confianza seguro ngain Dios. Jamé ixin Jesucristo ojoincheroa ansean na para que ján na tsonoa na seguro que ixonhi teca na de cain tti jianha que jointtoho na, co cai inchin Dios ojoinchetsinda cuerpoa na para que ján na nchao tsonchián na ngain. <sup>23</sup> Ján na sonttoho na sigue cainxin tiempo de sotticaon na ngain Dios co xonhi tiempo tsen-toxinhi na tti ján na dotticaon na ixin Dios rrochjá na tti jehe ndačo. <sup>24</sup> Co chonda na que rrotsjehe na de quexén sonttoho na para tsjenguijna chó na para sonao chó na co para sonttoho na jian. <sup>25</sup> Rrochondaha na que sonttoho na inchin nchehe tti chojni que ixatteha para nchesayehe Dios, sino que ján na chonda na que sonttoanimá chó na para que tsji na ngain tti xatte na mé, co icha jai que ojítionchian tti nchanho que Jesucristo tsí iná.

<sup>26</sup> Ixin si ján na sonttoho na sigue de sinao na sonttoho na jianha después de que ján na ojoat-soan na tti ndoa, ixonhi cosa jí para que ján na sanjo na ngain Dios para que jehe sinttatjañá na cosa jianha que sonttoho na. <sup>27</sup> Si jamé sonttoho na, ján na jeho nchao rrochonhe na tti anto soji castigo ngain xohi que jiche para rrochexin cain tti ningaconhe Dios, are Dios sinchejuzgá cain cosa. <sup>28</sup> Are chonja chonji que xa vitticaon ngain ley que vayé Moisés joincheha inchin co-tonha ley mé co si vintte yó o ní chojni de testigo que ndačo ixin ndoa vícon que tti iná chojni joincheha inchin coetonha ley mé, chojni mé vayé castigo de navenxon co xonhi chojni coaxin joach-jaon. <sup>29</sup> Mexinxin janto icha soji castigo tequin-

inxin tti chojni que ningaconhe Xenhe Dios, co xaxaon na ixin xonhi rentte jní Xan que coingo Xan, co nichja na feo de ixin Espíritu Santo de Dios, tti anto rinao jehe na! Co jehe jní Cristo, mé tti nchese gurá tti trato naroaxin, co trato mé tti joinchejian chojni mé. <sup>30</sup> Ján na noa na que Dios, tti chonda cain joachaxin, ndačo: “Janha tti sinttastigá chojni jianha; janha tti tsjengá na hna inchin tequininxin na.” Co cai ndačo: “Dios, tti chonda cain joachaxin, sinchejuzguehe chojni jehe.” <sup>31</sup> ¡Ixin anto tangui tsonhe chojni que teca jianha ngattoxon con Dios que jichon!

<sup>32</sup> Pero xaxaon ra jaha ra ngain tiempo vatto are jaha ra nandá vayehe ra joadingasán, rročo que coexinhi ra vitticaon ra Jesucristo, are mé jaha ra coixinha ra conixin paciencia tti anto tangui que conha ra are jaha ra joincheluchá ra para ditticaon ra Jesucristo. <sup>33</sup> Are mé canxion de jaha ra feo xanttjo ra na co joinchehe na feo nganji ra ngattoxon con icha chojni. Co icanxin ra conoha ra tangui are vicon ra ixin nicompañeroa ra vetan na tangui. <sup>34</sup> Jaha ra coiaconoeha ra chojni Jesucristo que teaxinhi ngain cárcel, co masqui joantsjaha ra na cosá ra pero chaha ra ixin onoha ra que ngajni chonda ra cosa icha jian que cosa nntihi ngataha nontte, co cosa mé tsonchjenhe para cainxin tiempo. <sup>35</sup> Mexinxin nchetjanha ra confianza que jaha ra chonda ra ixin confianza yá tti tsiaho para ixin jaha ra ná jian premio. <sup>36</sup> Jaha ra rrogondaha ra rrochonda ra paciencia para sinchehe ra inchin rinao Dios co para sayehe ra tti jehe ndačo sanjo. <sup>37</sup> Ixin ngain tti jitaxin Palabré

Dios nttiha ndaĉho:

Daca, chonda que anto daca,

tsí jehe tti chonda que tsí, co jehe tsonĉjenha.

<sup>38</sup> Pero tti chojni que janha rrondaĉhjan ján ixin jehe jian chojni, mé sinttechon na ixin ditti-caon na na janha,

pero si jehe na isitticaonha na na janha, janha isariha contento ngain jehe na.

<sup>39</sup> Pero ján na jeha tti chojni que isitticaonha co sitján, sino que ján na tti chojni que ditticaon cain tiempo co jamé tettenchjinha na almá na.

## 11

### *Tti confianza ngain Dios*

<sup>1</sup> Are ján na chonda na confianza ngain Dios, mé rroĉho ixin chonda na seguro que ján sayé na tti ján na techonhe na, co tedotticaon na mé, masqui ján na ǵa doconha na. <sup>2</sup> Canxion nigoelitoa na ǵanĉhjen are saho, cjoí na jian ngattoxon con Dios ixin vechonda na confianza ngain Dios.

<sup>3</sup> Por ixin confianzá na ngain Dios, noa na que jehe coetonha para conchjian cain mundo. Mexinxin cain cosa que jai docon na conchjianxin de ngain ná tti ĉhoha docon na.

<sup>4</sup> Co Abel ixin jehe vechonda confianza ngain Dios, mexinxin jehe joanjo ná cosa icha jian ngain Dios que tti joanjo xanĉó Caín, co mexinxin Dios ndaĉho que ján Abel jehe jian, co Dios vayé tti joanjo Abel. Jañá mexinxin masqui Abel ondavenhe, pero ján na ǵa tetanguí na de ixin Dios de ixin tti confianza que vechonda Abel.

<sup>5</sup> Cai Enoc ixin jehe vechonda confianza ngain Dios, jehe ndavenha; Dios sajoicao para ngajni, co icha chojni iviconha na Enoc ixin Dios sajoicao para ngajni. Co cai ngain tti jitaxin Palabré Dios, nttiha ndačo que icha saho que Dios sajoicao Enoc para ngajni, Dios joincheřoxinhi cain tti joinchehe Enoc. <sup>6</sup> Pero Dios jehe čhoča rroché ngain ná chojni si chojni mé chondaha confianza ngain Dios, ixin para tsonchian ni ngain Dios, jehe ni chonda ni que sitticaon ni que ixin Dios jáń jí co ixin sinchenaon cain chojni que ttjé na jehe Dios.

<sup>7</sup> Cai Noé vechonda confianza ngain Dios. Mexinxin are Dios joinchenohe Noé ixin siconhe cosa que Noé řa řonhi tiempo vicon, Noé vitticaon tti ndačo Dios co Noé joinchekjian arca para que nifamié ndavenxinha na de ixin jinda. Co de ixin confianzé Noé ngain Dios, Noé cjoago que ixin cain chojni que vaguitticaonha Dios ngain tiempo mé jianha na ngattoxon con Dios. Pero Dios ndačo que Noé jehe jian ixin vechonda confianza ngain Dios.

<sup>8</sup> Cai Abraham vechonda confianza ngain Dios, mexinxin are Dios nichjé jehe, jehe vitticaon co vačhe sacjoi para ngain tti nontte que después Dios joanjo de herencia ngain jehe. Jehe Abraham vačhjexin de ngain nonttehe co sacjoi pero venoeha para ttinó sajittji. <sup>9</sup> Co ixin Abraham vechonda confianza ngain Dios, mexinxin jehe vehe ngain tti nontte que Dios ndačo joanjo, masqui inchin chojni que joixin de cjin. Mexinxin jehe vexinhi nchia de carpa, co cai jamé joinchehe xenhe Isaac co Jacob, que cai vayé na



tti ndačo Dios que rroganjo. <sup>10</sup> Jamé vanchehe Abraham ixin jehe chonhe cjoí ngain tti ciudad que tončhenhe para cainxin tiempo, que Dios joinchechjan, co mé rročo ngajni tti ttjen Dios.

<sup>11</sup> Cai Sara, nčhičhihi jehe Abraham, ixin jehe nča misma vechonda nča confianza ngain Dios, masqui jehe nča anto onačhichjan para rrojincheconcjiji chjan, pero vayé nča joachaxin de joincheconcjiji nča ná chjan, co jamé jehe nča cjoí nča janné chjan mé ixin vechonda nča confianza que Dios ján rrojinchehe tti jehe ndačo.

<sup>12</sup> Jańá conhe Abraham masqui anto odačhichjan, pero řa joichonda ná xenhe, co de xan mé después anto cotsje chojní Abraham hasta que chojni mé inchin cain conotse ngajni co inchin cain řochjenhe nchíse que jí ngandehe ndachaon, que čhoha ttequin ni.

<sup>13</sup> Cain chojni mé ndavintteguenhe na co vayeha na cain cosa que Dios ndačo ixin rroganjo ngain na. Pero ixin jehe na vechonda na confianza co vitticaon na ixin Dios ndoa rroganjo cain inchin jehe ndačo, mexinxin jehe na anto vaché na ixin vechonxin na ixin cain mé rroguiconhe después. Co mexinxin jehe na ndačo na que jehó joigatto na ngain mundo jiji ixin jehe na jeha de nttihi na, čho na. <sup>14</sup> Mexinxin cain chojni que nichja jańá, jehe na tendačo na claro que řa tettjé na iná nontte que soan nonttehe na. <sup>15</sup> Si jehe na řa rrořaxaon na de ngain tti nontte que joixin na, jehe na nchao rrocjan na nttiha iná. <sup>16</sup> Pero jehe na joinao na iná nontte icha jian, rročo que jehe na rinao na ná lugar nttiha ngajni. Mexinxin Dios tosoeha de

dinhi Dios de jehe na, ixin jehe ojoinchechjian ná ciudad nttiha ngajni para ixin jehe na.

<sup>17</sup> Abraham, ixin vechonda confianza ngain Dios, mexinxin are Dios vaquehe prueba ngain Abraham, are mé Abraham joiaho Isaac, xenhe jehe para narrogoenxon xan co rroganjo xan ngain Dios. Abraham vehe dispuesto de rroganjo tti nacoaxinxon xenhe que jehe vechonda masqui Dios ondačo ngain Abraham: <sup>18</sup> “De ngain xanha Isaac tsotsjexin anto tsje chojnia jaha.” <sup>19</sup> Abraham jamé joinchehe ixin jehe vechonxin que Dios chonda joachaxin hasta para sinchexechon chojni que ndadenhe. Co ján na nchao rrondačo na cai que Abraham cjan vayé xenhe iná de ngayé nindadiguenhe ixin Abraham ovehe dispuesto para narrogoenxon jehe xan.

<sup>20</sup> Cai Isaac ixin jehe vechonda confianza ngain Dios, mexinxin jehe ndačo ngain Jacob co ngain Esaú, xenhe jehe Isaac, que ixin Dios seguro sinchenciaon xan. <sup>21</sup> Cai Jacob ixin jehe vechonda confianza ngain Dios, mexinxin are ochiaon ndajoiguenhe, jehe ndačo ngain cayoi xenhe José que ixin Dios sinchenciaon cayoi xan. Co Jacob vingattjenxin conixin nttacottohe co joinchecoanxinhi Dios. <sup>22</sup> Cai José vechonda confianza ngain Dios, mexinxin are ochiaon ndavenhe, jehe ndačo que después cain chojni Israel sachjexin na de nttiha ngain nonttehe Egipto. Co jehe José coetonha que are satsji na chonda na que sasicao na nttaloroe jehe.

<sup>23</sup> Cai nindoha Moisés vechonda na confianza ngain Dios, mexinxin are concjihi Moisés, jehe na coema na Moisés ngoixin ní conittjao ixin vicon

na que Moisés ná xanxichjan anto ĉhjoin jí, co ĵaonha na masqui coetonha rey que ixin cain xanxichjan de chojni Israel chonda que narrogoenxon na xan. <sup>24</sup> Cai Moisés vechonda confianza ngain Dios, mexinxin are jehe ojoiji ná xí, jehe ĉhoha para que vinhi xenhe nĉhichjehe rey de Egipto. <sup>25</sup> Sino que jehe icha joinao vetan tangui cai inchin icha chojní Dios en lugar de que jehe ĉhjoin rroconohe de rrojinchehe cosa jianha inchin joinao cuerpoe, ixin jehe venohe que mé jeho para nchion tiempo. <sup>26</sup> Moisés, jehe conohe icha rentte para jehe vetan tangui de ixin causexin Cristo que jehe rrogoechonda cain cosa que jí ngain nonttehe Egipto, ixin jehe venohe jian quehe sacha nttiha ngajni. <sup>27</sup> Cai ixin Moisés vechonda confianza ngain Dios, mexinxin jehe sacjoixin de ngain nonttehe Egipto, co jehe ĵaonha ixin rrocoñao rey de nttiha, sino que Moisés jehe joinchehe sigue jian vaguitticaon ngain Dios inchin orroguicon Dios que ni ná chojni diconha.

<sup>28</sup> Cai ixin Moisés vechonda confianza ngain Dios, mexinxin jehe coetonhe cain chojni Israel que sinchechjian na tti quiai pascua. Co coetonhe na ixin tsinga na jní coleco ngaré puerté nchia para que are joí ángel de Dios para nagoenxon cain xanxí xenhe chojni Egipto, xansaho ángel mé ĵonhi joinchehe ngain xenhe chojni Israel. <sup>29</sup> Cai ixin cain chojni Israel vechonda confianza ngain Dios, mexinxin jehe na vatto na ndachaon que dinhi Mar Rojo inchin si rrocji ngataha jinche xema. Co are xisoldado de Egipto joinao xa rro-

gatto xa jamé cai, pero nttiha ndacjonhe xa jinda.

<sup>30</sup> Cai ixin chojni Israel vechonda confianza ngain Dios, mexinxin are jehe na ngariandanji na yáto nchanho ngain ciudad Jericó ttjarioho jie que vechonda ciudé na para vaguinttemanxin na are vaquetocaho na icha chojni, ttjarioho mé vetsinga ttjario. <sup>31</sup> Cai Rahab, tti nčí que vanchecji cuer-poe ngain tsje xí, pero por ixin confianza que jehe ncha coexinhi ncha vechonda ncha ngain Dios, mexinxin jehe nčí mé venha ncha are ndavint-teguenhe cain icha chojni ngain ciudad mé ixin nčí mé jian vayé ncha tti chojni Israel que joit-saya ciudad mé.

<sup>32</sup> ¿Co quehe icha rrondačhjan janha? Janha ichondaha tiempo para rrondattjo ra de ixin Gedeón, de Barac, de Sansón, de Jefté, de David, de Samuel co de ixin cain profeté Dios. <sup>33</sup> Cain nimé cai ixin confianzé na ngain Dios, mexinxin canxion na joacha na tsje nontte, co icanxin na coetonha na jian ngain chojni, co Dios cjoenguijna na inchin jehe ndačo ngain na. Co icanxin na are vetan na coleón, Dios cjoenguijna na para que joiniha na va. <sup>34</sup> Co icanxin na are vinttjin na ngacjan xohi que anto soji, pero xonhi conhe na. Co icanxin na, masqui chojni joinao narrogoenxon na conixin espada, pero nahi. Co tti chojni que tsangaha, jehe na contsanga na, co anto soji coeto na are ngain guerra co coixinhi na joacha na ngain cain soldadoe xivaningaconhe na. <sup>35</sup> Co vintte nčí que masqui ndavenhe xenhe ncha, pero Dios joinchexecon xan mé iná para ixin jehe ncha.

Co icanxin chojni večhoa co anto soji vicaon na. Co tti cjoaya ndache na ixin iħonhi cosa feo rroconhe na si irroguitticaonha na ngain Dios. Pero jehe na čhoha na, ixin jehe na icha rinao na que Dios sinchexecheon jehe na para rrochonda na ná vida icha jian. <sup>36</sup> Co icanxin chojni vetan na tangui are icha chojni cjoanoa na na co vicaon na conixin nttá, co hasta cadena vinttečhiaxin na co viaxinhi na ngain cárcel. <sup>37</sup> Co icanxin na nagoenxon na na conixin ħo, icanxin na hasta cončhinjidonga na na, icanxin na icha chojni joinao que jehe na rrogáčhjenda na de ngain Dios, icanxin na venxin na conixin espada; co icanxin na vangaria na cain parte co vinttengá na jeho roé coleco co contentso, co anto noa na, coá na joachjaon, co feo conhe na ngain icha chojni. <sup>38</sup> Cain chojni mé anto icha jian na que icha chojni. Vacjicoa na ngagaha nttá, co ngagaha jna, co vintte na ngaxinhi cueva, co ngain lugar que tečhjadoho nontte. <sup>39</sup> Cain chojni mé masqui Dios ovicon que ixin ján ndoa jian vaguitticaon na ngain Dios, pero vayeha na tti ndačo Dios rroganjo ngain na, <sup>40</sup> ixin Dios jehe ħaxaon iná cosa icha jian para ixin ján na, ixin jehe ndačo que cain chojni mé tsojian ngattoxon con Dios pero hasta conixin ján na cai.

## 12

### *Ján na rrotsjehe na ejemploe Jesucristo*

<sup>1</sup> Mexinxin ixin cainxin chojni mé que vitticaon na are saho cointtoá na na ejemplo mé, jai ján na tsín na ná lado cain cosa que ħonhi ħé co cain cosa jianha que ditaha na de sonttoho na, para que

nchao conixin paciencia sonttoho na xé Jesucristo que ján na chonda na. <sup>2</sup> Já n na rrotsjehe na ejemploe Jesucristo ixin jehe tti joiaoa na confianza que chonda na ngain Dios. Co jehe tti tsjenguijna na para sotticaon na mé para cain tiempo. Jesús jehe vetan tangui nganito cruz, co jehe joincheha caso tti joasoaxin que ixin jehe ndavenxin nttiha, ixin jehe ovenohe que después de setan tangui, jehe chjoin tsonohe co rroché. Co sajoiguehe ngain lado jian de tti ttjen Dios.

<sup>3</sup> Mexinxin jaha ra chonda ra que xaxaon ra ejemploe Jesús, que jehe anto tangui conhe de ngá rá chojni jianha; mexinxin jaha ra tonchjenha ra ni doanha ra desanimado de ngain xé Jesús. <sup>4</sup> Ixin masqui jaha ra tencheluchá ra ngain cosa jianha, pero ni ná ra xa ndadenha ra ixin tenchehe ra jamé. <sup>5</sup> ¿Aondatjañaha ra tti Dios ndattjo ra ixin jaha ra inchin xenhe jehe? Jehe ndačo janhi ngain tti jitaxin Palabré:

Hijo mio, ndačhoha ixin xonhi xé tti castigo que chjá Dios, para que jaha tsangui sinchehe cosa jian,

ni doanha desanimado are sinttasattaha jehe.

<sup>6</sup> Ixin Dios nchejian cain chojni que jehe anto riano, co nchecastigá cain tti chojni que jehe dayé inchin xenhe.

<sup>7</sup> Tonsoji ra ngain castigo mé ixin Dios jehe jamé sinchehe nganji ra ixin jaha ra xenhe jehe. ¿Apoco jí ná chjan que ndodé xan nchecastigaha ndo xan?

<sup>8</sup> Pero si Dios sinttacastigaha jaha ra inchin jehe nchecastigá cain xenhe jehe, mexinxin rročo que jaha ra jeha mero xenhe jehe. <sup>9</sup> Cai já n na are

nchinnchin gontte na, ndodá na de nttihi ngataha nontte vanttastigá na ndo, co ján vanttorespetá na ndo. Mexinxin ¿quedonda ján na sotticaonha na Ndodá na que ttjen ngajni para que jamé ján na rrochonda na iná vida naroaxin? <sup>10</sup> Cain ndodá na nttihi ngataha nontte vanttastigá na ndo nttihi ngain vida jihi que seha sonttechon na, inchin jehe ndo vaconohe ndo que nchao jí. Pero Dios jehe nttastigá na para tsjengujna na para que jehe nttajian na inchin jianxin jehe. <sup>11</sup> Ján ndoa que ni ná castigo nntaʒoxianha na ngain rato que ján na tedayé na castigo, sino que anto ttín na are mé: pero tti chojni que tangui de ngain castigo mé, después chojni mé chonda na vida jian co çhjoin tonohé na de ngain ansén na.

*Tti tsonhe chojni que rinaoha ditticaon tti ndaço Dios*

<sup>12</sup> Jañá ixin castigoe Dios anto rentte, mexinxin doan ra animado de nchehe ra tti jehe ndaço, co dinttechinha ra. <sup>13</sup> Co ttjé ra tti nttiha nao, co sattji ra ngatja nttiha mé para que chojni que jai ditticaonha jian, sicon na ejemploa ra co sitticaon na icha en lugar de isitticaonha na.

<sup>14</sup> Nchehe ra de que cain ra dintte ra çhjoin conixin icha chojni ngain vida jihi, co daçhjendehe ra cain cosa jianha, ixin chojni que daçhjendeha na de ngain cosa jianha çhoaha rrochonxin na Dios. <sup>15</sup> Ttjiho ra cuidado para que ni ná ra tsinttoeha ra de sayehe ra ayuda que ttixin de ngain Dios, co para que ni ná ra sintteha ra inchin ná ca que anto tsja que nchejianha icha ca. <sup>16</sup> Co ttjiho ra cuidado cai

que ni ná jaha ra dinttečhicoha ra iná nčhí que jeha nčhíchiha ra, ni ndačhoha ra ixin cosé Dios xonhi rentte inchin joinchehe Esaú, co mexinxin jehe joinhecji derecho que jehe vechonda de chjan saho ngain xanchó xanJacob. Cain mé joinhecji por ixin nacoa comida. <sup>17</sup> Co jaha ra noha ra que después, are Esaú joinao que ndodé rrojinchetsenhe ndo ñao Dios para que Dios rrojinchenchaon jehe Esaú, ndodé Esaú ičhoha ndo. Co masqui jehe Esaú anto tsjanga pero jehe čhoha vittja quexén rrojinchehe para rroquentoxinhi tti jehe joinchehe.

<sup>18</sup> Jaha ra conchienha ra ngain ná jna que nchao catte ni inchin joinchehe chojni Israel que conchienhe na ngain jna Sinaí tti jiche xohi, co tti vehe anto naxin xehe co tti anto soji cjoa čhinto.

<sup>19</sup> Ni jaha ra coinha ra are coyao trompeta ntthiha ni are nichja Dios ngain jehe na. Co cain chojni que coinhi mé, jehe na joinchetsenhe na ñao Moisés que ixin irronichjaha Dios icha jañá ngain jehe na. <sup>20</sup> Jehe na ndačo na jañá ixin coixinha na de joaxaon, de ixin tti coetonha Dios are ndačo: “Quexeho chojni o coxigo que tsingachje ngagaha jna jihi, jaha ra chonda ra que nasoenxon ra chojni mé o coxigo mé conixin xó o conixin ná lanza.”

<sup>21</sup> Cain na anto xaon na de ixin tti vicon na ngain jna mé, que hasta Moisés mismo ndačo: “Janha rriřanga na de joaxaon.”

<sup>22</sup> Pero en lugar de jihi, jaha ra conchienhe ra ngain jna de Sión co ngain tti ciudad de Dios, cayoi mé rročo ngain Jerusalén de ngajni, co ngain tsje miles de ángel. <sup>23</sup> Co conchienhe ra ngain icha



chojni xenhe Dios que tequininxin ngajni; co jaha ra conixin jehe na co cain ángel mé tenchecoanx-inhi ra Dios. Co jaha ra oconchienne ra ngain Dios tti Juez de cainxin chojni co de ngain cain espiritue chojni jian que Dios joinchejian. <sup>24</sup> Co jaha ra conchienne ra ngain Jesús, tti abogadoa na ngain Dios para tti trato naroaxin, co chonda ra confianza ngain jní Jesús que jehe cointtji para nttajian na ján na; co jni jehe danjo icha jian cosa que jni Abel.

<sup>25</sup> Mexinxin jaha ra ttjiho ra cuidado de nchehe ra caso Dios, tti jinichjá na. Ixin Dios anto soji joinchecastigá chojni Israel are jehe na joincheha na caso tti Dios ndache na de ngain Moisés are ngain jna Sinaí que jí ngataha nontte jiji. Mexinxin ján na seguro soan na castigado si sonttoha na caso tti jindattjoxin na Dios desde ngajni.

<sup>26</sup> Are Dios nichjexin chojni Israel de ngagaha jna Sinaí, are mé tté jehe joinchequingui nontte, pero jai jehe ndačo: “Iná nttiha janha sinttaquingui jeoha nontte, sino que cai ngajni.” <sup>27</sup> Are jehe ndačo “iná nttiha”, ján na ttinxin na que are mé rroxantte cain cosa que nchao ttingui que Dios joinchechjian, co jehó siguehe tti čhoha tsingui.

<sup>28</sup> Tti lugar que Dios chjá na, tti jehe ttetonha, mé čhoha tsingui. Mexinxin ján na chonda na que rrochjé na gracias ngain Dios de ixin cain jiji, co sonttocoanxinhí na jehe Dios inchin jiquininxin, conixin respeto inchin jehe rinao, <sup>29</sup> ixin Dios jehe inchin ná čhohi que tjaga cain cosa jianha.

*Quexén sinchehe ni para sincheꝑoxinhi Dios*

<sup>1</sup> Ttinttoeha ra de rinao chó ra inchin rrocji ra ichó ra cainxin ra. <sup>2</sup> Co ꝑonhi tiempo tjañaha ra de dayehe ra chojni que diji nchiandoi ra ixin jamé canxion chojni vayé na ángel de Dios ngain nchiandoha na, masqui jehe na ni vanjoha na cuenta que tti vayé na jehe ángel de Dios.

<sup>3</sup> Co ꝑaxaon ra cain chojni que teaxinhi ngain cárcel, inchin rrocji que jaha ra rroguinteaxinha ra nttilha cai conixin jehe na. Co ꝑaxaon ra de ixin tti chojni que vicaon por ixin nichja de ixin Jesús, ixin jaha ra cai chonda ra ná cuerpo que tonohe ttín.

<sup>4</sup> Cain ra ꝑo tottaha ra, nchehe ra inchin tequininxin chojni que otottehe, co danjoha ra cuerpoa ra ngain iná chojni ixin Dios sinchejuzguehe cain tti chojni que danjo cuerpoe ngain oje chojni que jaha xixihi ni jaha nchiichihi, co ngain tti chojni que chonda xicoxehe o nchicoxehe.

<sup>5</sup> ꝑaxaonha ra de rrochonda ra icha tomi, sino que dintte ra contento conixin jehó tti ochonda ra ixin Dios ndačo: “Janha ꝑonhi tiempo tsinttoha jaho, co ꝑonhi tiempo satsjixin de nganji.”

<sup>6</sup> Mexinxin jai ján na nchao rrondačo na conixin confianza:

Dios jehe tti ttjenguijna na janha;

co ꝑagoanha ni ná cosa que sinchena čhonja chojni.

<sup>7</sup> ꝑaxaon ra de ixin tti chojni que coetonha ngain ningoa ra, co de ixin tti chojni que ndattjo ra joajné Dios. ꝑaxaon ra quexén joinchehe na ngain vidé na, co ditticaon ra ngain Dios inchin jehe na vitticaon na.

<sup>8</sup> Jesucristo xonhi tiempo ojé; jehe xajeho jna, jai, co para cainxin tiempo. <sup>9</sup> Jaha ra dittoaxinha ra que icha chojni sinttacoanha ra na ojé cosa que ndoaha de ixin Dios. Icha jian tsosoji ansean na de ixin tti jian que ttixin de ngain Dios, co sotticaonha na tti regla de ixin quehe sine ni, ixin regla mé ttjenguijnaha pero ni tti chojni que ditticaon regla.

<sup>10</sup> Co Jesucristo tti joanjo vidé para ixin ján na, pero tti dána que nchehe inchin ttetonha ley que vayé Moisés chondaha derecho de sayé ayuda ngain Cristo. <sup>11</sup> Ixin dána judío icha importante xanxinhi jní coxigo ngaxinhi Lugar Santísimo de ngain ningoe na. Jní mé tti danjo dána ngain Dios para ditjañehe tti jianha que nchehe cain chojni judío. Pero cuerpoe cain coxigo mé che ngain xohi, ndoja de rajné na. <sup>12</sup> Jamé cai Jesús vetan tangui are ndavenhe, pero ndoja de ciudad para joinchejian cain chojni conixin jní jehe. <sup>13</sup> Mexinxin chjin na ngain jehe masqui chojni ndačo ixin anto soaxin ixin dotticaon na ngain jehe. <sup>14</sup> Ixin ngataha nontte nttihi ján na chondaha na ni ná ciudad que tsončjenhe para cainxin tiempo, sino que ján na tettjé na tti ciudad que tsí después. <sup>15</sup> Mexinxin cainxin tiempo ján na chonda na que sonttocoanxinhi na Dios por ixin ngain nombré Jesucristo co mé tti jiquinixin sonttoho na. ¡Mexinxin cain na sonttocoanxinhi na Dios conixin rroha na! <sup>16</sup> Co xonhi tiempo tjañaha ra de nchehe ra jian co ttjenguijna ra icha chojni conixin tti chonda ra, ixin mé tti nchexoxinhi Dios dayé de nganji na.

<sup>17</sup> Ditticaon ra tti chojni que ttetonha ngain

ningoa ra, co nchehe ra tti jehe na rrondačo na ixin jehe na nitedicao cuidado de ixin almá ra ixin nohe na que jehe na nisanjo cuenta ngain Dios. Mexinxin nchehe ra de que jehe na rroché na nganji ra co jeha de que sinttechín na nganji ra, ixin si jaha ra nchehe ra para que jehe na sinttechín na, jaha ra setan ra tangui.

<sup>18</sup> Nchetsenhe ra ñao Dios para ixin janha na ixin janha na chonda na seguro ixin nttaha na inchin jiquininxin, co rinaho na que cainxin tti sinttaha na, mé jian. <sup>19</sup> Janha anto danchiaha ra que jaha ra nchetsenhe ra ñao Dios para que Dios rrochjana joachaxin rrocjan na toin para sasotsjaha ra iná.

### *Tti joexinxin joajna jihi*

<sup>20</sup> Dios, tti rroanha tti çhjoin que tonohé ansén ni, mé tti joinchexechon Jesucristo, tti chonda cain joachaxin para ixin ján na, co tti chonda cuidado para ixin ján na inchin ná tti jian ttin-garia coleco dicao cuidado ixin colecoe, co jehe joinchese gurá tti trato naroaxin que xonhi tiempo tsjexin, conixin jní jehe. <sup>21</sup> Que Dios mé sinttajian ra para que nchao sinchehe ra inchin jehe rinao, co de ixin Jesucristo jehe sinchehe de nganji cain ján na inchin jehe sinao. ¡Gloria ngain Cristo para cainxin tiempo! Amén.

<sup>22</sup> Hermanos, janha nttatsanha ñao ra que chonda ra paciencia para ttinxin ra cain palabra de consejo jihi, ixin janha cjinha ra carta jihi, pero atto nchín carta. <sup>23</sup> Janha rrinttanoha jaha ra que hermano Timoteo ovaçhjexin de ngain cárcel tti jehe vehe. Si jehe tsí nttihi toin, janha sasoquian are janha saso para sasotsjaha ra iná.

<sup>24</sup> Chjehe ra joajna cain chojni que ttetonha ngain ningoa ra, co cain chojni que ditticaon ngain Jesucristo. Cain chojni que ditticaon ngain Jesús nttihi nonttehe Italia rroanha na joajna para ixin cain jaha ra.

<sup>25</sup> Que Dios sinttanchaon ra cain ra jaha ra. Amén.

## **Tti jian joajné Jesucristo New Testament in Popoloca, San Marcos Tlalcoyalco**

copyright © 1982 Wycliffe Bible Translators, Inc.

Language: San Marcos Tlalcoyalco Popoloca (Popoloca, San Marcos Tlalcoyalco)

Translation by: Wycliffe Bible Translators, Inc.

Popoloca, Tlalcoyalco [pls], Mexico

### **Copyright Information**

© 1982, Wycliffe Bible Translators, Inc.

This translation text is made available to you under the terms of the Creative Commons License: Attribution-Noncommercial-No Derivative Works. (<http://creativecommons.org/licenses/by-nc-nd/3.0/>) In addition, you have permission to port the text to different file formats, as long as you do not change any of the text or punctuation of the Bible.

You may share, copy, distribute, transmit, and extract portions or quotations from this work, provided that you include the above copyright information:

You must give Attribution to the work.

You do not sell this work for a profit.

You do not make any derivative works that change any of the actual words or punctuation of the Scriptures.

Permissions beyond the scope of this license may be available if you contact us with your request.

### **The New Testament**

in Popoloca, San Marcos Tlalcoyalco

### **© 1982, Wycliffe Bible Translators, Inc.**

This translation is made available to you under the terms of the Creative Commons Attribution-Noncommercial-No Derivatives license 4.0.

You may share and redistribute this Bible translation or extracts from it in any format, provided that:

You include the above copyright and source information.

You do not sell this work for a profit.

You do not change any of the words or punctuation of the Scriptures.

Pictures included with Scriptures and other documents on this site are licensed just for use with those Scriptures and documents. For other uses, please contact the respective copyright owners.

2018-11-16

---

PDF generated using Haiola and XeLaTeX on 11 Nov 2022 from source files  
dated 29 Jan 2022

a23ba35e-b016-5f67-a705-694e460cf18a